

PEMBERITAHUAN PERTANYAAN

DEWAN RAKYAT, MALAYSIA

**DARIPADA : Y.B. DATUK NOOR EHSANUDDIN BIN MOHD HARUN NARRASHID
(KOTA TINGGI)**

PERTANYAAN : BERTULIS

Y.B. DATUK NOOR EHSANUDDIN BIN MOHD HARUN NARRASHID [KOTA TINGGI] minta **MENTERI KEWANGAN** menyatakan apakah Dasar Kewangan (Monetary) Negara yang ada masih mampu menangani krisis mata wang negara.

JAWAPAN

Dalam persekitaran ekonomi luar yang tidak menentu, dasar kewangan (monetari) negara yang ada masih mampu menangani krisis mata wang negara. Objektif dasar kewangan negara adalah untuk mengekalkan kestabilan harga serta pada masa yang sama untuk terus menyokong pertumbuhan ekonomi dengan menyediakan persekitaran yang kondusif.

Malahan, dasar ini juga memastikan keadaan yang teratur dalam pasaran pertukaran mata wang asing dan mengelakkan turun naik yang ketara dalam kadar pertukaran. Ini adalah penting memandangkan Malaysia merupakan sebuah ekonomi yang sangat terbuka dengan aktiviti perdagangan dan pelaburan antarabangsa yang tinggi.

2. Dalam tempoh suku pertama 2015, Keluaran Dalam Negeri Kasar (KDNK) benar mencatat pertumbuhan yang memberangsangkan sebanyak 5.6% terutamanya disokong oleh aktiviti ekonomi domestik yang rancak. Pertumbuhan ini dicerminkan oleh asas-asas ekonomi negara yang mapan walaupun ringgit telah menyusut nilai baru-baru ini. Dalam tempoh yang sama, kadar inflasi berada pada paras terkawal dengan Indeks Harga Pengguna meningkat sebanyak 0.7% yang mana sebahagiannya disebabkan oleh harga import dan komoditi yang rendah. Selain itu, rizab antarabangsa Malaysia turut meningkat sebanyak dolar AS106.2 bilion (RM393.4 bilion) pada 15 Mei 2015 berikutan sentimen pelabur yang bertambah baik.

3. Prestasi semasa ekonomi negara menunjukkan Malaysia tidak berhadapan dengan krisis ekonomi mahupun krisis mata wang sebagaimana yang berlaku pada tahun 1997/1998. Ini memandangkan

struktur ekonomi Malaysia pada ketika itu adalah amat berbeza jika dibandingkan dengan sekarang. Kini kedudukan fundamental ekonomi negara adalah kukuh termasuk struktur ekonomi dan eksport negara mempunyai asas kepelbagaian yang luas dengan disokong oleh kekukuhan daya tahan dalaman serta sistem kewangan dan perbankan yang teguh.

4. Justeru, berdasarkan kepada kedudukan asas-asas ekonomi yang kukuh dan momentum pertumbuhan ekonomi negara yang terus cergas dan teguh, adalah jelas negara kita tidak berhadapan dengan krisis ekonomi ataupun krisis mata wang.